



### 惜：生活三帖（北四縣腔）

#### 【第一帖 膨線心】

閒著，你就在恬靜个暗夜  
 默默仔，緊刺緊鉤一頂膨線帽  
 一刺一鉤个惜啊  
 落在吾个頭那頂高  
 裡背，包等燒暖  
 毋驚寒風來吹

有閒，你就在孤單个房間  
 恬恬仔，緊刺緊鉤一條頸圍仔  
 一刺一鉤个愛啊  
 圍在吾个頸根面項  
 裡背，燒暖燒暖  
 毋驚霜風來吹

長長个膨線  
 一條接一條，密密  
 連起恩兩儕純純个感情  
 軟軟个膨線  
 一條並一條，比比  
 牽起恩兩儕黏黏个情緣

一刺一鉤个惜啊  
 日日夜夜  
 刻在吾个心肝  
 一刺一鉤个愛啊  
 歲歲年年  
 燒暖吾个圓身

#### 【第二帖 白色个頭那毛】

土妹企上矮凳頂  
 目珠金金，雙手緊翻  
 日光燈下  
 一條一條白白个頭那毛  
 擲一條問一句講  
 「媽媽，愛分僱麼个獎勵？」  
 十條百條个白色頭那毛  
 花忒土妹歸點鐘个時間

媽媽坐佇矮凳頂  
 目珠眨眨，雙手交扼  
 腦鏡顯影  
 一條一條烏烏个頭那毛  
 生佇土妹个頭那頂  
 心肚緊恸緊暢——  
 十條百條个白色頭那毛  
 換來土妹快樂个童年

僱坐佇書桌面前  
 看著這幅影像  
 寫下這份感動  
 心肝肚續敗勢起來

### 【第三帖 粽子】

粽子佇夢中跣起  
一雙皺皮个手  
寫著出世以來个辛酸  
溫柔个雙手包捻  
兩皮粽葉个圓滿  
一串一串齊亮个粽掞  
底下  
一隻一隻勻勻恁大  
裡肚  
一個一個勻勻會想  
十點鐘過个糯米牽聲  
正香菇个風味漫天  
胡椒粉个辣味衝天  
蘿蔔乾个土味甘脆  
老蒜頭个味緒流轉  
靚豬肉个原味流瀉

阿姆个一生人  
就像一隻一隻  
透長年个粽子  
分人安謐一生人

### 創作理念

在吾个生命歷程底肚，偃得著當多个疼惜，這兜疼惜，分偃當大个感動同鼓勵，也係創作个源泉。這三首詩歌創作个背景，係從生活出發，來自於吾个親身經驗，經驗个底層，係吾心肝肚个感動，透過詩歌个形式同佢表現出來，這三首詩仔，就係生活中有關「惜」个故事。個人一直認為，詩文个創作愛佇自家感動个題材內容開始，確立主題、追求形式同內容个門搭，寫出感動自家、感動別人、感動大家个作品。希望這兜詩作，做得分人一息仔感動。

邱一帆

苗栗縣南庄國小教師兼教導主任

